


Bulteno de la Londona Esperanto-Klubo

londonaesperantoklubo.com

Julio - Aŭgusto 2026



Paddington en somero

Venu esperantumi dum dimanĉo la 5a de julio

Laŭ longdaŭra kutimo la klubo organizas malpli da eventoj dum julio kaj aŭgusto, sed ni ne tute ĉesas aktivi dum tio, malgraŭ la varmo. Ĉijare ni daŭrigos niajn surlokajn kunvenojn je la dua vendredo de ĉiu monato, sed ankaŭ organizas tagon kun du esperantaj okazoj por la 5a de julio.

En la mateno, kadre de la klubo de Reading kaj Oksfordo, Rico invitas nin kafumi kaj babili ĉe kafejo en *Paddington*. Okazas tia kafumado en sinsekvo de lokoj, en Reading en unu monato, en Oksfordo en la sekva, kaj en Londono en la tria. La okazoj estas ĉiam neformalaj, kaj oni estos ĉiam bonvena. La julia kunveno komenciĝos je 10:30 matene en *Black Sheep Coffee*, tre bela kafejo, kiu troviĝas nur tri minutojn piede de Paddington.

Samtage okazos la LEK-a grupa promeno. Je 15:00 ni renkontiĝos en centro de Londono por "serĉi leonojn". Ni sekvos planitan voyon nomatan "pride in the quarter trail", laŭ kiu vojo troviĝas 17 leonoj, kreitaj de artistoj, inter la multaj vidindaĵoj de tiu parto de la urbo. Informo en la angla troviĝis ĉe london-hq.co.uk/events/pride-in-the-quarter-trail/.

La kunvenejo por la promeno estos ĉe la elirejo de la metro-stacio *Temple* (linioj *District* kaj *Circle*), apud la rivero. Ni gvidos nin mem, do ni povos elekti nian rapidecon, sed la informo sugestas ke la promeno daŭros ĉirkaŭ 90 minutojn.

Kaj poste eblas kafumi (denove?), manĝi, aŭ alie fari ion laŭ nia volo. Se vi volas partopreni en la promeno,

bonvolu provi indiki antaŭe, por ke oni sciu atendi vin - eblas sciigi per nia retejo, per eventa servo, per Telegramo aŭ alimaniere.

Por la kunvenoj en Highbury, mi esperas ke oni venu kun ideoj, aŭ sendu tiujn ideojn antaŭe. Lastjare ni en unu ludis, kaj en la alia okazis lingva diskuto. Mi ne memoras nun la temojn, sed mi havas memoron ke ni ĝuis, kio estas la gravaĵo.

Mi esperas ke ĉi tiel ni povos doni ion ĝueblan al tiuj kiuj restos en la urbo dum somero, kaj por tiuj kiuj ferios, mi esperas ke vi ankaŭ ĝuos, kaj eble revenos kun interesaj spertoj kiujn vi volos kunhavigi kun la klubo.

Phil Housley



Kluba programo

Julio

5. **Kafumado en Paddington.**



5. **Grupa promenado.**



10. **Ĉeesta kunveno** surloke en Highbury.



Aŭgusto

14. **Ĉeesta kunveno** surloke en Highbury.



Kion ni faru en niaj surlokaj kunvenoj?

La klubo decidas ke nia programo daŭru, en malgranda formo, dum la somero, sed ni ne havas precizan planon. Kiel kutime je la dua vendredo de ĉiu monato oni kunvenos en Highbury, sed la temoj ne estas deciditaj. Ĉar iuj uloj estos for, la okazoj eble estos malpli formalaj ol kutime, se tio eblas ... la kunvenoj jam alproksimiĝas al tuta neformaleco. Jen iuj ebloj:

Ludo: Ni lastatempe ĝuis ludi je Slaloma konkuro (*Blockbusters*) - ni povos fari tion denove, sed verŝajne jam estas tro frue, ĉu? Ni komencis ludi je Pasis-la-tempo, do ni povus provi tion, sed mi memoras ke ni dubis pri nia eventuala sukceso. Kaj ĉiu alia ludo ankaŭ eblas, se oni kunportos kaj klarigos regulojn.

Diskuto: En la mondo estas multaj polemikaj temoj pri kiuj ni povus debati aŭ kvereli. Mi parte ŝercas tie, ĉar ŝajnas ke tre ofte esperantistoj konsentas pri gravaĵoj. Sed certe ni povas diskuti, kaj dum la somero ni havos tempon.

Lerno: Pri Esperanto aŭ pri io ajn, ni povas kune lerni ion. Mi mem havis lastatempe dubon pri verb-tempoj, ĉu tio povas esti interesa temo? Aŭ ni povus studi fromaĝon, aŭ ursojn, aŭ astrojn ...

Verko: Ĉu ni kapablas verki ion kune, kaj ĉu ni ĝuus tion?

Nia kunvenejo

Highbury View, 89 Ronalds Road, London, N5 1XQ

La ejo estas facile atingebla de la metrostacio Highbury & Islington. Temas pri pli-malpli 10-minuta piedirado. Atentu, ke **por eniri la ejon, oni bezonas enirkodon**. Se vi ne konas ĝin kaj intencas ĉeesti, bv. kontakti nin per la kontakto-paĝo en nia retejo por havi la kodon.

KER-ekzamenoj venas

En la venontaj semajnoj du grupoj da homoj provos trapasi KER-ekzamenojn pri Esperanto. Iuj faros rete, kaj iuj ĉe la UK en Graco. Kvankam nun estas tro malfrue por aliĝi, mi volas atentigi kaj memoriĝi pri la eblo.

La KER-sistemo (alilingve CEFR) estas tut-eŭropa oficiala sistemo por difini nivelojn de lingvo-kapablo. Per trapaso de KER-ekzameno oni povas havi pruvon pri sia kapablo en Esperanto, egalan al diplomoj pri aliaj lingvoj. Eĉ se oni ne havas uzon por tia pruvo, la fakto ke homoj provas kaj sukcesas en tiaj ekzamenoj estas bona por Esperanto mem, kaj montras al mondo ke homoj serioze kaj bone uzas nian lingvon.

Se vi ja ekzameniĝos ĉifoje, ni deziras al vi bonŝancon kaj sukceson. Ankaŭ, mi certas ke se vi bezonas helpon pri io, iu de la klubo pretos helpi al vi. Plej utile povas esti simple veni al eventoj kaj paroli!



LA LONDONA
ESPERANTO-KLUBO

Rakonteto: Kurado

Unu tagon, en la somero, mi kuris. Apud mia loĝejo estas paŝvojo laŭ rivero. Oni povas esti for de la aŭtoj, bruoj, maltrankviligoj, kaj tute ne pensi dum kelkaj minutoj, simple ĝuante la senton de la vento sur la vizaĝo. Aŭ teorie estas tiel. Praktike, mi trovas kuradon malfacile laciga. Kaj ĝenerale mi dolorigas iun parton de mi, foje parton pri kiu mi ne antaŭe estis konscia.

Sed unu tagon, en la somero, ĉio funkciis bone. Estis neniu penso en mia menso, mi nur kuris kaj sentis. Antaŭ mi, estis kurbo en la vojo. Tio ne estas problemo, mi scias kiel kuri laŭ kurbo. Sed, estas alia eblo. Mi povas simple kuri rekte, salti super la barilo, kaj flugi trans la rivero. Mi metas unu piedon sur la grundon, sed la sekvan mi metas sur nevideblan ŝtupon. Mi povas simple decidi kien meti la piedojn, kaj mi plialtiĝas rapide, ĝis mi povas antaŭensalti super la akvo.

Mi etendas la brakojn, levas la kapon, rigardas la ĉielon, kaj plirapidigas laŭvole ĝis mi soras en libero. Mi ĉirkaŭflugas, leviĝas, plonĝas, spiraliras, ĝis ..

Mi subite estis denove sur la grundo. Mia brusto iom doloris. Ĝi estis premita kontraŭ la barilo, kiu savis min de la akvo.

Phil

